

– Դու լաւ տղայ կը դառնաս, – ասաց բեկը, – ես քեզ իմ որդիների մէջ կը պահեմ եւ կը սովորես քաջ լինել:

Մտքումս ասեցի, եթէ քաջութիւնը աւագակութեան մէջն է, ես երբեք նպատակ չունեմ այդ սովորելու:

– Ես այնքան երկչոտ չեմ, որքան դուք կարծում էք, բեկ, – պատասխանեցի լսելի ձայնով:

– Այդ մենք կարող ենք փորձել, – ասաց նա, – եւ փորձելու առիթ կայ. քո ձին, որ Մըհեն յանձնել է մի հովոյի, նա ռաւանդների ցեղին է պատկանում. թշտառականը, որպէս խոստացել էր, դեռ չէ վերադարձրել ձին: Երեւի պահելու միտք ունի: Ռաւանդների երամակները մեզանից ոչ այնքան հեռու մի սարի ետեւում արածում են: Եթէ քեզանում սիրտ կայ, այս ըրպէս կը գնաս եւ նրանց ձիերից մի քանի հաստ կը բերես: Էգուց նրանք ստիպած կը լինեն քո ձին բերել եւ իրանցը տանել:

Ես զարմացայ բեկի մի այսպիսի առաջարկութեան վրայ եւ պատասխանեցի.

– Դիցուք թէ մի խաբերայ հովիւ, օգուտ քաղելով Մըհէի միամտութիւնից, իմ ձին տարաւ եւ ետ դարձնելու նպատակ չունի. բայց ես ի՞նչ իրաւունք ունեմ ուրիշի ձին բերել նրա փոխարէն:

Բեկը պատասխանեց.

– Զիմա երեւաց, որ դու ոչ միայն երկչոտ ես, այլ աշխարհի կարգն էլ չես իմանում:

Ես կարծում էի, թէ բեկն այս բոլորը կատակի համար էր խօսում, բայց երբ Ասլանը պատմեց մի քանի բաներ քրդերի կեանքից, այն ժամանակ ես համոզուեցայ, որ նա կատակ չէր անում: Քրդերի մէջ օրէնքի զօրութիւն էր ստացել այն սովորութիւնը, երբ մի առանձին ցեղի պատկանող մարդ յափշտակում է որեւիցէ ուրիշ ցեղի հասարակութեանը պատկանող մի մարդու սեփականութիւնը, վերջինը իրաւունք ունի իր կորուստի փոխարէնը յափշտակել աւագակի ցեղին պատկանող մի օտար մարդու կայքից, թէեւ նա ամենեւին խառն չէ եղել յիշեալ գողութեան գործի մէջ: – Այստեղից առաջ են գալիս այն անընդհատ յափշտակութիւնները, որ կատարւում են տարբեր ցեղերի մէջ եւ պատճառ են տալիս նրանց մշտական կռիւներին: Վրէժխնդրութեան մի այսպիսի ձեւը շարժական կայքից անցնում է անձինքների վրայ: Մի ցեղին պատկանող մարդ իր սպանած ազգակցի արեան փոխարէն կարող է սպանել մի ուրիշ մարդու հակառակ ցեղից, թէեւ նա բոլորովին անմեղ լինէր: – Դա ծագում է այն սկզբունքից, որ ցեղը քրդերի մէջ մի ամ-